

Visoki predstavnik pozdravlja dolazak Peter Bas-Backera na funkciju višeg zamjenik visokog predstavnika

Visoki predstavnik Christian Schwarz-Schilling je izrazio dobrodošlicu ambasadoru Peter Bas-Backeru koji je danas preuzeo funkciju višeg zamjenika visokog predstavnika.

Visoki predstavnik je takođe iskoristio priliku da se zahvali bivšem višem zamjeniku visokog predstavnika, ambasadoru Martinu Neyu, na trudu i neumornom radu tokom devet mjeseci njegovog boravka u Bosni i Hercegovini, posebno u oblasti reforme odbrane i reforme javnog emitiranja kao i na jačanju političkog dijaloga i civilnog društva, uključujući i napore koje je poduzimao kako bi animirao mlade birače, ojačao osjećaj bh. identiteta među građanima te iskoristio kolektivnu energiju, kao i inicijativu nevladinih organizacija i zvaničnika okrenutih ka budućnosti.

Ambasador Bas-Backer će biti zadužen za pitanja reforme odbrane i obavještajnog sektora, jačanje državnih institucija i reformu javne uprave, reformu i uspostavu modernog evropskog javnog RTV sistema, razvoj civilnog društva kao i za pitanja koja se odnose na probleme mladih u BiH.

Prije dolaska na dužnost višeg zamjenika visokog predstavnika za Bosnu i Hercegovinu, ambasador Bas-Backer bio je šef nizozemskog Ureda u Prištini, Kosovo. Ured kojim je rukovodio bio je nadležan za redovne diplomatske aktivnosti, kao i za zastupanje zemalja-predsjedatelja Evropskom unijom na Kosovu u periodu od januara 2003. godine do polovine 2005. godine.

Ambasador Bas-Backer ima veliko iskustvo u cijelom regionu jugoistočne Evrope, a posebno u Bosni i Hercegovini. U periodu

od 2001. do 2003. godine bio je zamjenik visokog predstavnika za BiH i šef Odjela za rekonstrukciju i povratak koji je bio angažiran na provedbi Aneksa 7. Dejtonskog sporazuma. Ambasador Bas-Backer je u svojstvu političkog savjetnika bio nadležan za pitanja izrade evropske odbrambene i sigurnosne politike i njen uticaj na područje zapadnog Balkana. U periodu od 1996. do 1997. godine ambasador Bas-Backer bio je zamjenik šefa Monitoring misije Evropske zajednice u bivšoj Jugoslaviji, a prije te funkcije radio je kao šef Odjela za Istočnu Evropu pri Direkciji za evropska pitanja u okviru nizozemskog Ministarstva vanjskih poslova i zamjenik koordinatora za politiku prema bivšoj Jugoslaviji.

Ambasador Bas-Backer diplomirao je javno pravo na nizozemskom Univerzitetu u Leyden-u, te završio postdiplomski studij iz ekonomije, historije, prava i sociologije na evropskom Institutu des Hautes Etudes International u Nici, Francuska. Oženjen je, otac dvoje djece. U slobodno vrijeme se bavi crtanjem, slikanjem i izradom kolaža.

Ambasador Bas-Backer je u službi nizozemskog Ministarstva vanjskih poslova od 1975. godine.